

# АКАФИСТ ПРЕПОДОБНОМУ ИОАННУ, РЫЛЬСКОМУ ЧУДОТВОРЦУ И ПУСТЫННОЖИТЕЛЮ

## Кондак 1

Избранный Богом и предивный житием, преподобне Иоанне, от юности Христа возлюбив, путем тесным к Нему шествовал еси; великих же ради подвигов твоих и слез излиятий дарованными Духа Святаго обогатился еси. Темже яко велие ко Святей Троице дерзновение имуща ублажаем тя, просяще: от всяких нас бед свободы, зовущих: радуйся, преподобне Иоанне, Рыльский чудотворче, славо и радости наша.

## Икос 1

Ангел земный и человек небесный был еси, преподобне Иоанне. Како убо славу твою воспоем достойно, многими немощьми обдержимии? Но сам вложи песнь хвалебную во уста нас, зовущих: Радуйся, от родителей благочестивых рожденный; радуйся, ими в страхе Божии добре воспитанный. Радуйся, из младенства от Церкви николиже отступивый; радуйся, тоя священными ученьми благодатный разум стяжавый. Радуйся, заповедей Господних блюстителю верный; радуйся, пощений и бдений непрестанных делателю усердный. Радуйся, по смерти родителей наследие свое убогим раздавый; радуйся, жития ради доброго гонение от человеков лукавых подъявый. Радуйся, клеветы неправедныя претерпевый; радуйся, досаждения с кротостию понесый. Радуйся, любовью Серафимскою вслед Христа последовавый; радуйся, ея ради путь узкий иночества избравый. Радуйся, преподобне Иоанне, Рыльский чудотворче, славо и радости наша.

## Кондак 2

Видя мира сего суету, преподобне Иоанне, невозвратно того отвратитися потщался еси; ничтоже бо тебе от Христа можаше разлучити: ни узы сродства, ни юность твоя, ниже слава мира сего и красота. Сия убо вся ни во чтоже вменив, якоже елень на источники водныя, к Богу востекл еси, вопия Ему: Аллилуиа.

## Икос 2

Разуму божественному покорился еси, блаженне, егда Господа в видении соннем узрел еси, от земли твоя изыти повелевающа ти и место спасения твоего показующа, и вся, яже в мире презрев, во обитель Руенскую вселился еси, идеже образ иноческий восприял еси. Сего ради вопием ти таковая: Радуйся, житие иноческое возлюбивый; радуйся, противу греха воинствовати даже до смерти восхотевый. Радуйся, купно с власы своими мирская вожделения отло-

живый; радуйся, с ненасытною жаждею к подвигом иноческим себе устремивый. Радуйся, в предняя простираяся, задняя забвению предавый; радуйся, сладость жителства уединеннаго в себе обретый. Радуйся, любве ради божественныя житие пустынное возлюбивый; радуйся, вины ради сея место пострига своего оставивый. Радуйся, к горе, в видении тебе явленной, пришедый; радуйся, ничтоже имей, в колибе хвратней себе вселивый. Радуйся, дивный пустынножителю; радуйся, Иоанна Крестителя подражателю. Радуйся, преподобне Иоанне, Рыльский чудотворче, славо и радости наша.

### **Кондак 3**

Силою Духа Святаго осеяем в пустыни вселился еси, Иоанне, безмолвное житие провождати, с Богом невозбранно беседовати, Того ангельски непрестанно славословити, лучами света Божественнаго озарятися, за вся же люди и мир Спасителю Богу молитися, поя Ему присно: Аллилуиа.

### **Икос 3**

Имея желание огнепальное боговидения Моисейскаго, преподобне, на гору возшел еси явления божественныя славы восприяти, ихже око не виде и ухо не слыша и яже на сердце человеку не въздоша. И кто возможет изрещи вся подвиги твоя, в безмолвии сотворенныя? Но мы, дивящеся житию твоему, сице зываем ти: Радуйся, бремя подвиг велиих на рамена своя возложивый; радуйся, житием твоим Ангелов удививый. Радуйся, яко не хлебом, но былием травным себе питал еси; радуйся, и того бо зело мало по захождении солнца вкушал еси. Радуйся, жажду водою в меру утолявый; радуйся, купно с пророком “скотен бых у Тебе” Богу вопиявый. Радуйся, яко потоки слез от очей твоих источал еси; радуйся, молитвы бо твоя непрестанно Богу возсылал еси. Радуйся, подвиги сими от страстей себе очистивый; радуйся, бесов в зверине образе тебе устрашити тщавшихся посрамивый. Радуйся, адаманте, козными вражиими несокрушимый; радуйся, во всех искушениях и напастех всегда с Богом бывый. Радуйся, преподобне Иоанне, Рыльский чудотворче, славо и радости наша.

### **Кондак 4**

Бурю напастей демонских укротити восхотев, в пещеру некую зело мрачную вселился еси, преподобне Иоанне, порабощая тело твое и лишаяся света солнечнаго, яко да не лишишися Божественнаго Света в Царствии Господа твоего и да поеши Ему тамо со всеми святыми: Аллилуиа.

### **Икос 4**

Слышав о тебе, преподобне, сын брата твоего, Лука отрок, и родителей утаився, к тебе в пустыню приде и тобою наставляем восприя подвиги твоя. Мы же силою благодати твоя ужасаема, вопием ти сице: Радуйся, Светом Божественным южика своего озаривый; радуйся, дитя малое пустынна жителя соделавый. Радуйся, от злобы древния сего ради напасть новую приемый; радуйся,

клевету в похищении отрока претерпевый. Радуйся, от брата своего поругания понесый; радуйся, детище от тебе отторженное благословением укрепивый. Радуйся, молитвою слезною диаволи посрамивый; радуйся, отрока от змия ужасеннаго смертию с Господем соединивый. Радуйся, цвете райский на камени гор Рыльских прозябый; радуйся, от Камене Божественнаго водою живою обильно напоенный. Радуйся, таинниче Божий, в пустыни не утайвись; радуйся светильниче Христов во мраце пещернем просветивыйся. Радуйся, преподобне Иоанне, Рыльский чудотворче, славо и радости наша.

### **Кондак 5**

Боготечней звезде подобни суть святии человецы: не точию бо сами ко Христу шествуют, но и прочиим людем спасения путь указуют. Сего ради вселукавый творит им напасти, якоже и тебе, Иоанне: нападе бо на тя во образе разбойник, иже избивше тя, отгнаша от пещеры первыя. Тогда ты в пустыню Рыльскую глубочае вшед, в дупло дуба великаго вселился еси, во еже большими труды Господа твоего прославляти и пети Ему: Аллилуиа.

### **Икос 5**

Видя Господь толикое озлобление твое, преподобне, повеле земли да израстит слануток тебе в питание; славна же тя яви пастырем, близ пустыни тоя обретшимся, да и мы купно с видевшими дивная дела твоя

вопием тебе таковая: Радуйся, от демонов велия страдания приемый; радуйся, воине Христов непобедимый. Радуйся, не до конца от них озлобленный; радуйся, Христа покровом всемогущим покровенный. Радуйся, пред лицом пастырей от Господа прославленный; радуйся, обретшим тя житие твое неволею известивый. Радуйся, знаком чудесным тех напитавый; радуйся, отшедших их чудом дивным наставивый. Радуйся, прочиим людем от них проповеданный; радуйся, от приходивших к тебе дарований Божиих не скрывый. Радуйся, зело страждуща бесна молитвою слезною исцеливый; радуйся, к совершению чудесе сего всю надежду на Бога возложивый. Радуйся, преподобне Иоанне, Рыльский чудотворче, славо и радости наша.

### **Кондак 6**

Проповедницы должны есмы быти смирения твоего, преподобне Иоанне, явленнаго пред исцелением беснаго в молитве твоей сицевой: “Боже милосердный, несмы достоин именовати Твое имя моими нечистыми усты!” Сего ради тщимся убо и мы во смирении молитися Господеви и пети Ему: Аллилуиа.

### **Икос 6**

Возсиявшу ти чудесы велиими, множайшую к тебе веру и любовь возимеша людие православнии. Но славе твоей по всей Болгарстей стране прошедшей, востав изшел еси от дуба, славы человеческия бегая. Темже смирения ради

твоего ублажаем тя сице: Радуйся, смирение божественное возлюбивый; радуйся, славу человеческую возненавидевый. Радуйся, гласа Христова к смирению призывающа, послушавый; радуйся, словеса Писания еже не нам, но имени Божию славу даяти, присно соблюдавый. Радуйся, высокая достигнувый и ни ких дел благих в себе не видевый; радуйся, древу плодоносна, ветвями низу клонящуся, подобен бывый. Радуйся, смирением Давиду, рекшему “аз есмь червь, а не человек”, поревновавый; радуйся, купно с пророком Исаиею “о, окаянный аз” вопиявый. Радуйся, со апостолом грешника себе первого нарицавый; радуйся, во смирении своем Самому Господу подражавый. Радуйся, тщеславию доблественне противоставый; радуйся, сие яко прах земный ногами поправый. Радуйся, преподобне Иоанне, Рыльский чудотворче, славо и радости наша.

### **Кондак 7**

Хотящу ти страдания большая подъяти пламенные ради ко Христу любви твоя, столпнику дивному Симеону уподобился еси, на камень возшед, преподобне Иоанне, во дни и нощи аки бесплотен молитву дея, слезами камень омывая и единому токмо Богу беседовати желая. Мы же на подвиг сей взирающе, прославляем всемогущаго Бога в тебе дивнаго и поем Ему: Аллилуиа.

### **Икос 7**

Новаго подвига твоего, блаженне, не стерпев диавол, поемлет с собою легион бесов, иже с камене тя в пропасть глубокую свергоша. Но ты с трудом велиим востав, паки на камень возшел еси творити молитвы твоя и дивящихся воставляеши звати ти: Радуйся, ко Христу любовь велию стяжавый; радуйся, сего ради тяжце от полков демонских пострадавый. Радуйся, страдания сия ни во чтоже вменивый; радуйся, Христа паче жизни твоя возлюбивый. Радуйся, ничим же от Христа разлученный; радуйся, Им сего ради возлюбленный. Радуйся, служения ангельскаго сподобивыйся; радуйся, от руки Ангела хлебом питававшийся. Радуйся, любовью ко Христу вся диавольская искушения победивый; радуйся, тою вся Христа заповеди соблюдавый. Радуйся, любви ради сея токмо славы Божественныя искавый; радуйся, сего ради от Господа прославленный. Радуйся, преподобне Иоанне, Рыльский чудотворче, славо и радости наша.

### **Кондак 8**

Станный образ жития твоего, велие смирение и любовь твоя ко Христу приумножиша в тебе благодать, яже ти в крещении Христовых ради страстей и смерти крестныя даровася. Сего ради сотвори тя Господь солнце духовное Православныя Церкви, да просвещаются тобою чада ея ко спасению и да вопиют Богу: Аллилуиа.

### **Икос 8**

Весь был еси сосуд избран Божия благодати, великий Иоанне, на тебе исполнился Крестителя слово, яко не в меру Бог дает Духа. Киими благодатными

дарованьми не увенчана ты Бог? Киими явленьми благодати не исполнено бысть твое житие? Темже на ты взирающе, приносим ти похвалы сия наша: Радуйся, дар смирения Христова стяжавый; радуйся, слез и умиления благодать снискавый. Радуйся, чистотою и целомудрием от Бога украшенный; радуйся, верою чудодейственною озаренный. Радуйся, не токмо Христу веровавый, но и страдания за Него понесый; радуйся, даром ревности по Бозе увенчанный. Радуйся, любви к ближним исполненный; радуйся, даром Божественнаго ведения сподобленный. Радуйся, даром прозорливства просиявый; радуйся, дарование молитвы непрестающия имый. Радуйся, до конца надежду будущаго блаженства сохранивый; радуйся, блаженство сие еще в жизни сей предвкусивый. Радуйся, преподобне Иоанне, Рыльский чудотворче, славо и радости наша.

### **Кондак 9**

Всякое дарование Духа Святаго восприимшу ти, преподобне Иоанне, достижие вещание твое благочестиваго царя Петра, иже видети ты вожделев посла к тебе девять мужей. Ты же алчных их быти духом разумев, малым хлебом напитал еси, иже преславное чудо сие видевшие, вопияху Богу: Аллилуиа.

### **Икос 9**

Ветии мира сего не разумеют, како царь Петр, сый во славе своей, к тебе с дары устремися, блаженне, и зело опечалися, не возмогий стремнин ради горных ко святыни твоей приблизитися: но мы, словеса Господа поминающе, ко всем людем реченная, “ищите прежде царствия Божия и правды Его”, вопием ти: Радуйся, яко Царство Небесное на земли достигл еси; радуйся, Царство бо сие, пришедшее в силе, яви ти Господь. Радуйся, яко Царство Божие в стяжании благодати людем явил еси; радуйся, во плоти бо сый блаженство райское в себе таил еси. Радуйся, яко бисер многоценный стяжав, суету благ временных показал еси; радуйся, яко правду и мир и радость о Дусе Святе имел еси. Радуйся, сиянием бо благодати славу царскую затмил еси; радуйся, яко сокровище небесное имый, даров царских не приял еси. Радуйся, яко зрети друг друга в небесном царствии царю Петру обещал еси; радуйся, яко царя в Писании твоём милосерда и Церкви послушна быти увещал еси. Радуйся, яко покаянию царя научил еси; радуйся, яко покаяния ради царство вечное ему предрекл еси. Радуйся, преподобне Иоанне, Рыльский чудотворче, славо и радости наша.

### **Кондак 10**

Спасти хотя себе до конца от козней вражиих, преподобне Иоанне, пребыл еси в подвиге стояния на камени семь лет и четыре месяцы. Мнози же поревновавшие тебе, близ камене твоего церковь создаша и обитель составиша, начальника ты перваго и пастыря имуща, да возсылается отгуду присно хвалебная Богу песнь: Аллилуиа.

### **Икос 10**

Стена непреборима бысть ти смирение твое даже до смерти, блаженне Иоанне; разумев бо время отшествия твоего, моление слезное Богу вознесл еси, глаголя: “Отче Вседержителю, ничтоже на земли благо сотворих! Сего ради молю Тя повелети Ангелу благу прийти, да не возбранен ми будет восход от духов лукавствия! Господи, в руке Твои предаю дух мой!” И сия рек, абие дух испустил еси. Мы же, сицевому праведному преставлению дивящися, тако тя ублажаем: Радуйся, житием и исходом твоим нас поучаяй; радуйся, горняя мудрствовати, а не земная нас призываяй. Радуйся, никиимже сластем мирским себе приобщивый; радуйся, блаженную кончину от Бога приемый. Радуйся, о смерти присно в животе своем помышлявый; радуйся, словеса апостола “по вся дни умираю” исполнивый. Радуйся, со апостолом Павлом смерти вождемый; радуйся, разрешитися и со Христом быти присно желание имевый. Радуйся, слезами и молитвами себе к смерти уготовавый; радуйся, сего ради от смерти не на суд, но в живот пришедый. Радуйся, вечней радости со Христом по смерти приобщивыйся; радуйся, дерзновение велие пред Богом стяжавый. Радуйся, преподобне Иоанне, Рыльский чудотворче, славо и радости наша.

### **Кондак 11**

Пением молебным ублажати тя наставшу времени, благовоние нача от гроба твоего источатися, преподобне Иоанне. Сего ради гроб твой отверзоша и тело твое обретоша нетленно и благоухания исполнено. Оттоле многая чудеса совершахуся от мощей твоих во исцеление к тебе прибегающих и Богу вопиющих: Аллилуиа.

### **Икос 11**

Светоприемную свещу яви тя Господь, преподобне, и храм Духа Святаго, тело же твое тлению непричастно соблюде. Взираючи убо на благодать сию, прославляем тя сице: Радуйся, нетлением твоим всемогущество Божие благовествуяй; радуйся, безсмертие телес последи общаго воскресения предобразуяй. Радуйся, нетлением твоим славу Божию в Церкви явивый; радуйся, истину воскресения мертвых утвердивый. Радуйся, по смерти игумену обители Рыльския во сне явивыйся; радуйся, твоя мощи в Средец град пренести повелевый. Радуйся, дивная чудеса и zde сотворивый; радуйся, в град Тернов пренесен велия знамения соделавый. Радуйся, от мощей твоих во градах стольных благодать проливаяй; радуйся, и в пленении быв силами всех ужасивый. Радуйся, Мануилу царю греческому исцеление даровавый; радуйся, епископу Остригомскому язык связавый и разверзавый. Радуйся, преподобне Иоанне, Рыльский чудотворче, славо и радости наша.

### **Кондак 12**

Благодать велию дарова ти Господь за многую любовь, предивный угодниче Божий, преподобне отче наш Иоанне, недуги исцеляти, заблуждшия просве-

щати и всем просящим быти во спасение. Темже благодаряще Господа, нам тебе даровавшего, присно зовем ему: Аллилуиа.

### **Икос 12**

Поюще тебе песнь недоумеем, како вся дивная деяния твоя словесы немощными изобразити, преподобне! Зряще же тя велика в угодницех Божиих, дерзаем сице восхвалити тя, зовуще: Радуйся, в подвизех и трудах предивный; радуйся, прославленным тобою Богом прославленный. Радуйся, далече вне Церкви Болгарския просиявый; радуйся, и иными Православными Церквами чтимый. Радуйся, нетленною десницею в Церкви Российстей обитаяй; радуйся, благодатию великих отцев Церкви блистаяй. Радуйся, подвиги преподобных Антония и Макария явивый; радуйся, деяния светил российских Сергия и Серафима предизобразивый. Радуйся, от краля унгарскаго прославленный; радуйся, и от турецких султанов почтенный. Радуйся, во обители Рыльстей верными и неверными доселе почитаемый; радуйся, велиих ради чудес твоих от всех прославляемый. Радуйся, преподобне Иоанне, Рыльский чудотворче, славо и радости наша.

### **Кондак 13**

О, великий Иоанне, Рыльский чудотворче! Приими сию малую похвалу нашу и молися за ны ко Господу, да ниспослет нам милость Свою и покаянию истинному научит нас, избавит же нас от власти миродержителей тьмы века сего и сохранит в православней вере же и благодатном жительстве под дивным покровом Божия Матере, да спасеннии твоим ходатайством вопием Богу: Аллилуиа.

**(Этот кондак читается трижды, затем икос 1 и кондак 1)**